



IBSU

შპს - შავი ზღვის საერთაშორისო უნივერსიტეტი
ხარისხის მართვის სისტემის დოკუმენტაცია

სადოქტორო სწავლებისა და სადისერტაციო საბჭოს დებულება

დამტკიცებულია აკადემიური საბჭოს მიერ 23/08/2016წ. - ოქმი #14 (დანართი #7)

დამტკიცებულია

ქვემოთ მოცემული ხელმოწერები ადასტურებს, რომ აღნიშნული ინსტრუქცია წაკითხული და მიღებულია ხელმოწერის ავტორები ადასტურებენ, რომ ისინი ნამდვილად ფლობენ წინამდებარე დოკუმენტში არსებულ ინფორმაციას და უზრუნველყოფენ მასში ასახული პირობების განხორციელებას.

მომზადდა: სამაგისტრო და სადოქტორო სწავლების ინსტიტუტი _____

შეამოწმა: ხარისხის მართვის მთლიანი საბჭო _____

დაამტკიცა: აკადემიური საბჭო _____

დოკუმენტის No: IBSU.R05G

ვერსია: 4.00
განახლების თარიღი:
11/06/2019
დამტკიცების თარიღი:
23/08/2016

შეუმოწმებელი ვერსია შემოწმებული ვერსია

შპს-ს კუთვნილი დოკუმენტაცია.

წინამდებარე დოკუმენტით სარგებლობამდე, დარწმუნდით, რომ აღნიშნულ დოკუმენტს აქვს საბოლოო განახლების ნომერი.

ცვლილების შეტანის სურვილის შემთხვევაში, ხარისხის მთლიანი მართვის საბჭოს წარუდგინეთ დოკუმენტის ცვლილების მოთხოვნის ფორმა.

შინაარსი

შეტანილი ცვლილებები.....	4
ცვლილებების ნუსხა.....	5
მუხლი 1. საგანი და მოქმედების სფერო	6
მუხლი 2. ტერმინთა განმარტებები	6
მუხლი 3. სადოქტორო პროგრამის შემუშავება, განხორციელება, განვითარება.....	7
მუხლი 4. სადოქტორო პროგრამის სტრუქტურა	7
მუხლი 5. სწავლების ენა	7
მუხლი 6. სწავლების ხანგრძლივობა	8
მუხლი 7. სადოქტორო პროგრამაზე ჩარიცხვა.....	8
მუხლი 8. უცხო ენის გამოცდისაგან გათავისუფლების საფუძვლები.....	10
მუხლი 9. კომპონენტებზე რეგისტრაცია	10
მუხლი 10. კომპონენტის შეფასება.....	11
მუხლი 11. კვლევით კომპონენტთან დაკავშირებული პროცედურები	12
მუხლი 12. დოქტორანტის ხელმძღვანელი/თანახელმძღვანელი.....	13
მუხლი 13. პროგრამის ხელმძღვანელი.....	15
მუხლი 14. სადისერტაციო საბჭო და დარგობრივი სადისერტაციო საბჭო.....	15
მუხლი 15. სადისერტაციო საბჭოს უფლებები და მოვალეობები	16
მუხლი 16. დისერტაციის დაცვისათვის წარდგენა	18
მუხლი 17. დისერტაციის ექსპერტები	20
მუხლი 18. დისერტაციის წინარე დაცვა.....	22
მუხლი 19. დისერტაციის ოპონენტები	23
მუხლი 20. დისერტაციის შეფასება ექსპერტებისა და ოპონენტების მიერ.....	24
მუხლი 21. დაცვის კომისია	25
მუხლი 22. დაცვისთვის მომზადება და დისერტაციის დაცვა.....	26
მუხლი 23. დისერტაციის შეფასება	27
მუხლი 24. აკადემიური ხარისხის მინიჭება	28

მუხლი 25.	დოქტორის აკადემიური ხარისხის დამადასტურებელი დოკუმენტი	29
მუხლი 26.	ნაშრომის გაუქმება	29
მუხლი 27.	გარდამავალი და დასკვნითი დებულებები	30

შეტანილი ცვლილებები

#	გადაწყვეტილების მიმღები ორგანო	გადაწყვეტილების №	თარიღი
1.	აკადემიური საბჭო	9	22.08.2017
2.	აკადემიური საბჭო	8	11.06.2019

თავდაპირველი რედაქცია: 23.08.2016

ცვლილებების ნუსხა

#	თარიღი	მუხლი	შენიშვნები
1	22.08.2017	7	სადოქტორო პროგრამაზე ჩარიცხვა
2	22.08.2017	8	უცხო ენის გამოცდის ჩაბარებისაგან გათავისუფლება
3	22.08.2017	10	კომპონენტის შეფასება
4	22.08.2017	11	საკვლევი თემის დამტკიცება
5	22.08.2017	12	დოქტორანტის თანახელმძღვანელი
6	22.08.2017	16	დისერტაციის დაცვისათვის წარდგენა
7	22.08.2017	27	გარდამავალი დებულებები
8	11.06.2019	3	სადოქტორო პროგრამის შემუშავება, განხორციელება, განვითარება
9	11.06.2019	5	პროგრამის სწავლების ენა
10	11.06.2019	7	სადოქტორო პროგრამაზე ჩარიცხვა
11	11.06.2019	8	უცხო ენის გამოცდის ჩაბარებისაგან გათავისუფლება

მუხლი 1. საგანი და მოქმედების სფერო

- 1.1. წინამდებარე დებულება აწესრიგებს შპს - შავი ზღვის საერთაშორისო უნივერსიტეტში სადოქტორო სწავლებასა და სადისერტაციო საბჭოს ფუნქციონირებასთან დაკავშირებულ საკითხებს „უმაღლესი განათლების შესახებ“ საქართველოს კანონისა და უნივერსიტეტის დებულებების თანახმად.
- 1.2. დოქტორანტურა არის უმაღლესი განათლების მესამე საფეხური, რომელიც წარმოადგენს სასწავლო და სამეცნიერო კომპონენტები ერთობლიობას, მიზნად ისახავს სამეცნიერო კადრის მომზადებას და მთავრდება დოქტორის აკადემიური ხარისხის მინიჭებით.

მუხლი 2. ტერმინთა განმარტებები

- 2.1. ინსტიტუტი - სამაგისტრო და სადოქტორო სწავლების ინსტიტუტი;
- 2.2. უსდ - უმაღლესი საგანმანათლებლო დაწესებულება;
- 2.3. ცენტრი - სსიპ - განათლების ხარისხის განვითარების ეროვნული ცენტრი;
- 2.4. სადისერტაციო საბჭო - ფაკულტეტზე არსებული სადისერტაციო საბჭო, რომელიც იქმნება წინამდებარე დებულებით დადგენილი წესით;
- 2.5. დარგობრივი სადისერტაციო საბჭო - საბჭო, რომელსაც საკუთარი შემადგენლობიდან ამტკიცებს ფაკულტეტის სადისერტაციო საბჭო წინამდებარე დებულებით დადგენილი წესით;
- 2.6. უცხო ენა - ენა, რომელიც განსაზღვრულია პროგრამაზე დაშვების წინაპირობად;
- 2.7. სამდივნო - სადისერტაციო საბჭოს სამეცნიერო სამდივნო;
- 2.8. უნივერსიტეტი - სადოქტორო საგანმანათლებლო პროგრამების განხორციელების უფლების მქონე უმაღლესი საგანმანათლებლო დაწესებულება, რომელიც ავტორიზებულია საქართველოს კანონმდებლობის საფუძველზე ან უცხო ქვეყნის უმაღლესი საგანმანათლებლო დასესებულება, რომელიც აღიარებულია ამავე ქვეყნის კანონმდებლობის შესაბამისად;
- 2.9. შპსუ - შავი ზღვის საერთაშორისო უნივერსიტეტი.

მუხლი 3. სადოქტორო პროგრამის დაგეგმვა, შემუშავება, განვითარება

- 3.1. სადოქტორო პროგრამას შეიმუშავებს ინიციატორი, რომელიც შეიძლება იყოს უნივერსიტეტის ასოცირებული ან სრული პროფესორი და რომელიც პროგრამის დამტკიცების შემთხვევაში, ხდება ამავე პროგრამის ხელმძღვანელი.
- 3.2. სადოქტორო პროგრამის გახსნისათვის საჭიროა სულ მცირე 4 (ოთხი) სტუდენტის არსებობა. ინსტიტუტის საბჭოს გადაწყვეტილებით, სადოქტორო პროგრამა შესაძლებელია გაიხსნას ნაკლები რაოდენობის სტუდენტებისთვისაც.
- 3.3. სადოქტორო პროგრამის დაგეგმვის, შემუშავებისა და განვითარებასთან და განვითარებასთან დაკავშირებული სხვა საკითხები მოწესრიგებულია „საგანმანათლებლო პროგრამების დაგეგმვის, შემუშავებისა და განვითარების ინსტრუქციით“ (R36I2).

ცვლილებები შეტანილია აკადემიური საბჭოს 2019 წლის 11 ივნისის გადაწყვეტილებით - ოქმი #8

მუხლი 4. სადოქტორო პროგრამის სტრუქტურა

- 4.1. სადოქტორო პროგრამა მოიცავს არანაკლებ 180 კრედიტს, რომელიც შედგება სასწავლო (პროფესორის ასისტირება, კვლევითი უნარები, სემინარი და ა.შ.) და კვლევით კომპონენტებისაგან (დისერტაციის მომზადება და მისი დაცვა და ა.შ.). ამასთან, თითოეული კომპონენტისათვის მინიჭებული კრედიტების რაოდენობა შესაძლებელია მოდიფიცირდეს სადოქტორო საგანმანათლებლო პროგრამის სპეციფიურობის, კომპეტენციების, რომლის გამომუშავებასაც მიზნად ისახავს კომპონენტი, ოდენობისა და იმ აუცილებელი პირობის გათვალისწინებით, რომ სასწავლო კომპონენტების ჯამური ოდენობა არ აღემატება 60 კრედიტს.

მუხლი 5. სწავლების ენა

- 5.1. სადოქტორო პროგრამებზე სწავლების ენა არის ქართული ან ინგლისური სადოქტორო პროგრამიდან გამომდინარე.

ცვლილებები შეტანილია აკადემიური საბჭოს 2019 წლის 11 ივნისის გადაწყვეტილებით - ოქმი #8

მუხლი 6. სწავლების ხანგრძლივობა

- 6.1. სადოქტორო პროგრამაზე სწავლების ხანგრძლივობა, ჩვეულებრივ, შეადგენს 6 (ექვსი) სემესტრს.
- 6.2. სტუდენტი, რომელმაც ვერ დაამთავრა სადოქტორო პროგრამა 6 (ექვსი) სემესტრის განმავლობაში, უფლებამოსილია სწავლა გააგრძელოს თვითდაფინანსების გზით „სასწავლო პროცესის მარეგულირებელი წესის“ და „სწავლის საფასურის გადახდის წესის“ მოთხოვნების შესაბამისად.

მუხლი 7. სადოქტორო პროგრამაზე ჩარიცხვა

- 7.1. შსსუ-ს სადოქტორო პროგრამაზე ირიცხება პირი, რომელმაც მოიპოვა მაგისტრის ან მასთან გათანაბრებული აკადემიური ხარისხი საქართველოს კანონმდებლობით დადგენილი წესით ან მის მიერ უცხო ქვეყანაში მიღებული უმაღლესი განათლება აღიარებულია საქართველოს კანონმდებლობით დადგენილი წესით და უთანაბრდება მაგისტრის აკადემიურ ხარისხს და რომელიც აკმაყოფილებს სადოქტორო პროგრამით დადგენილ წინაპირობებს (უცხო ენის ცოდნა/ გასაუბრების წარმატებით გავლა/ საკვლევის თემის პროექტის დადებითად შეფასება და ა.შ.).
- 7.2. განმცხადებელთან, რომელიც აკმაყოფილებს სადოქტორო პროგრამაზე მიღებისათვის დადგენილ წინაპირობებს, ფორმდება ხელშეკრულება და გამოიცემა ჩარიცხვის თაობაზე რექტორის აქტი.
- 7.3. განმცხადებელმა უნდა წარმოადგინოს საკვლევი თემის პროექტი (არანაკლებ ხუთი გვერდი) მისი სამომავლო კვლევის სფეროში, რომელსაც აფასებს შესაბამისი დარგობრივი სადისერტაციო საბჭოს მიერ შექმნილი მიმღები კომისია. მიმღები კომისია შედგება დარგობრივი სადისერტაციო საბჭოს არანაკლებ 3 (სამი) წევრისა (პროგრამის ხელმძღვანელის ჩათვლით) და შესაბამისი დარგის არანაკლებ 2 (ორი) წარმომადგენლისაგან.
- 7.4. საკვლევი თემის პროექტის შეფასება ხორციელდება ორ ეტაპად. პირველ ეტაპზე მიმღები კომისია აფასებს საკვლევი თემის პროექტს, ხოლო მეორე ეტაპზე იმართება ინტერვიუ, რომლის შედეგები ფორმდება ოქმის სახით და ხელს აწერს მიმღები კომისიის ყველა დამსწრე წევრი.
- 7.5. საკვლევი თემის პროექტი და ინტერვიუ ფასდება რუბრიკის მიხედვით, რომელიც განსაზღვრულია შესაბამისი სადოქტორო პროგრამით. ამავე ეტაპზე, პროგრამის ხელმძღვანელის წარდგინებითა და სტუდენტთან

შეთანხმებით ინიშნება თემის სავარაუდო ხელმძღვანელი სასწავლო კომპონენტის შემდგომ განსახორციელებელი კვლევითი კომპონენტის მიზნებისათვის. ამასთან, თემის სავარაუდო ხელმძღვანელი ვალდებულია, სასწავლო კომპონენტის ათვისებისათვის, კვლევითი კომპონენტის მიზნებიდან გამომდინარე, სტუდენტს მისცეს შესაბამისი რეკომენდაციები.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

7.5¹ პროგრამაზე მისაღები გამოცდების ორგანიზებას ახორციელებს ინსტიტუტი.

ცვლილებები შეტანილია აკადემიური საბჭოს 2019 წლის 11 ივნისის გადაწყვეტილებით - ოქმი #8

7.6. სარეგისტრაციო პერიოდის განმავლობაში წარმოსადგენი დოკუმენტების ნუსხას აქვეყნებს ინსტიტუტი. სარეგისტრაციოდ წარდგენილ განაცხადს თან უნდა ერთვოდეს შემდეგი დოკუმენტები:

ა) ინფორმაცია განმცხადებლის განათლებისა და პრაქტიკული გამოცდილების შესახებ (CV);

ბ) მაგისტრის ან მასთან გათანაბრებული დიპლომის სანოტარო წესით დამოწმებული ასლი (უცხო ქვეყნის უმაღლესი საგანმანათლებლო დაწესებულების მიერ გაცემული დიპლომის შემთხვევაში, უფლებამოსილი ორგანოს მიერ გაცემული აღიარების დამადასტურებელი წერილის სანოტარო წესით დამოწმებული ასლი) ან ცნობა სამაგისტრო პროგრამის დასრულებისა და შესაბამისი კვალიფიკაციის მინიჭების თაობაზე (დიპლომი წარმოდგენილ უნდა იქნეს ერთი წლის განმავლობაში);

გ) პირადობის დამადასტურებელი დოკუმენტის ასლი (უცხოური პასპორტის შემთხვევაში - სანოტარო წესით დამოწმებული თარგმანი);

დ) უცხო ენის ცოდნის დამადასტურებელი საერთაშორისო სერტიფიკატი, რომლის დონე განსაზღვრულია თითოეული საგანმანათლებლო პროგრამით და რომლის შესაბამისობას ადასტურებს შხსუ-ს ენათა სკოლა და/ან ბოლო ხუთი წლის განმავლობაში საგანმანათლებლო პროგრამის სწავლების ენაზე აკადემიური ხარისხის მიღების დამადასტურებელი დოკუმენტი, ასეთი არსებობის შემთხვევაში.

7.7. საგანმანათლებლო პროგრამაზე ჩარიცხვასთან დაკავშირებული ადმინისტრაციული საკითხები წესრიგდება „სასწავლო პროცესის

მარეგულირებელი წესით“, წინამდებარე დებულებით დადგენილი გამონაკლისების გათვალისწინებით.

მუხლი 8. უცხო ენის გამოცდისაგან გათავისუფლების საფუძვლები

- 8.1. განმცხადებელი, რომელიც ფლობს საგანმანათლებლო პროგრამაზე დაშვების წინაპირობად განსაზღვრული შესაბამისი უცხო ენის დონის საერთაშორისო სერთიფიკატს, თავისუფლდება უცხო ენის გამოცდის ჩაბარებისგან. პროგრამის ენის დონის დადგენის მიზნით ჩატარებული გამოცდის დონე განისაზღვრება R03L05-ით.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

ცვლილებები შეტანილია აკადემიური საბჭოს 2019 წლის 11 ივნისის გადაწყვეტილებით - ოქმი #8

- 8.2. განმცხადებელი, რომელსაც სადოქტორო პროგრამის სწავლების ენაზე დასრულებული აქვს საგანმანათლებლო პროგრამა ბოლო ხუთი წლის განმავლობაში და მისი ნიშნების საშუალო (GPA) შეადგენს არანაკლებ 75 (სამოცდათხუთმეტი) ქულას 100 (ასი) ქულიდან ან 3 (სამი) ქულას 4 (ოთხი) ქულიდან, თავისუფლდება უცხო ენის გამოცდის ჩაბარებისგან.

- 8.3. თუ განმცხადებელი იმ ქვეყნის მოქალაქეა, სადაც სადოქტორო პროგრამის სწავლების ენა წარმოადგენს სახელმწიფო ენას, თავისუფლდება უცხო ენის გამოცდის ჩაბარებისგან.

მუხლი 9. კომპონენტებზე რეგისტრაცია

- 9.1. დოქტორანტურის პროგრამის კომპონენტებზე რეგისტრაციის პროცესი განისაზღვრება „სასწავლო პროცესის მარეგულირებელი წესის“ თანახმად, წინამდებარე დებულებით დადგენილი გამონაკლისების გათვალისწინებით.

- 9.2. ამ დებულების მიზნებისათვის, „სასწავლო პროცესის მარეგულირებელი წესით“ გათვალისწინებული საპატიო მიზეზის დასადგენად დაგვიანებული რეგისტრაციის შემთხვევაში, საჭიროა ინსტიტუტის საბჭოს თანხმობა.

- 9.3. ამ დებულების მიზნებისათვის, არჩევითი სასწავლო კურსის გახნისათვის საჭიროა სულ მცირე 3 (სამი) სტუდენტის განაცხადი. ამ წესიდან გამონაკლისი დაიშვება ინსტიტუტის საბჭოს გადაწყვეტილებით.

მუხლი 10. კომპონენტის შეფასება

- 10.1. შეფასება ხორციელდება სასწავლო და სამეცნიერო-კვლევით კომპონენტებში მიღებული შედეგების საფუძველზე. თუმცა შეფასების კრიტერიუმები განსხვავდება სასწავლო და სამეცნიერო-კვლევითი კომპონენტებისათვის.
- 10.2. შეფასების მეთოდი განისაზღვრება სილაბუსის ავტორის მიერ, რომელიც ხელმისაწვდომია სემესტრის დასაწყისში.
- 10.3. კომპონენტის შეფასება ხორციელდება რამდენიმე კრიტერიუმის მიხედვით: სასწავლო კომპონენტისათვის აღნიშნული ფორმებია შუალედური და დასკვითი შეფასება, რომელთა ჯამი წარმოადგენს საბოლოო შეფასებას, ხოლო სამეცნიერო-კვლევითი კომპონენტის შეფასება ხორციელდება ერთჯერადად, საბოლოო შეფასების სახით.
- 10.4. სასწავლო კომპონენტის შეფასებასთან დაკავშირებული ყველა საკითხი განისაზღვრება „სასწავლო პროცესის მარეგულირებელი წესის“ თანახმად.
- 10.5. სადოქტორო პროგრამის სტუდენტის გამოცდების ჩატარებასთან დაკავშირებული საკითხები განსაზღვრულია „სასწავლო პროცესის მარეგულირებელი წესისა“ და „გამოცდების ჩატარების წესის“ თანახმად.
- 10.6. კვლევით კომპონენტზე გადასვლისას, სტუდენტი ვალდებულია, გაიაროს სემესტრული რეგისტრაცია. ყოველი სემესტრის ბოლოს სტუდენტმა უნდა წარადგინოს პრეზენტაცია დარგობრივი სადისერტაციო საბჭოს წინაშე სემესტრის განმავლობაში მის მიერ განხორციელებული სამუშაოს შესახებ. სტუდენტი ვალდებულია, გაითვალისწინოს საბჭოს მიერ გაცემული რეკომენდაციები. ამასთან, აღნიშნული რეკომენდაციები მხედველობაში მიიღება წინარე დაცვის დროს. პრეზენტაციის წარდგენა შესაძლებელია განხორციელდეს სკაიპის მეშვეობითაც.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

მუხლი 11. კვლევით კომპონენტთან დაკავშირებული პროცედურები

11.1. საკვლევი თემის დამტკიცებისათვის:

ა) დოქტორანტი ირჩევს დისერტაციის სათაურს და ამზადებს ინდივიდუალური კვლევის გეგმას მისი თემის სავარაუდო ხელმძღვანელთან/თანახელმძღვანელთან და პროგრამის ხელმძღვანელთან ერთად. ინდივიდუალური კვლევის გეგმა უნდა ასახავდეს კვლევის მიზნებს, სტრუქტურასა და კვლევის განხორციელების სავარაუდო გრაფიკს;

ბ) სასწავლო კომპონენტის დასრულების შემდგომ, დოქტორანტი დარგობრივი სადისერტაციო საბჭოს წინაშე წარადგენს სავარაუდო სათაურსა და ინდივიდუალური კვლევის გეგმას;

გ) თემის სათაურსა და კვლევის გეგმას განიხილავს და ამტკიცებს დარგობრივი სადისერტაციო საბჭო. სტუდენტი წარადგენს მოკლე პრეზენტაციას საბჭოს წინაშე. საჭიროების შემთხვევაში, ხელმძღვანელი შესაძლებელია დაესწროს პრეზენტაციას ონლაინ რეჟიმში. თუკი თემის სათაური ან/და ინდივიდუალური კვლევის გეგმა არ დამტკიცდება სადისერტაციო საბჭოს მიერ, დოქტორანტს ეძლევა შესაძლებლობა შეცვალოს თემის სათაური/ინდივიდუალური კვლევის გეგმა;

დ) სადისერტაციო საბჭოს მიერ დამტკიცების შემდეგ, საკვლევი თემა რეგისტრირდება ინსტიტუტის მიერ და ფორმდება ხელშეკრულება დისერტაციის ხელმძღვანელს, სტუდენტსა და შხსუ-ს შორის.

11.2. სადისერტაციო თემის სათაურისა და კვლევის გეგმის დამტკიცებასთან წინამდებარე მუხლის 11.1 პუნქტით განსაზღვრული ყველა პროცედურა უნდა დასრულდეს შესაბამისი სემესტრის დასაწყისიდან 5 (ხუთი) კვირის განმავლობაში. ამასთან, ამავე პუნქტით განსაზღვრულ პროცედურასთან დაკავშირებული ოქმები ინახება სამაგისტრო და სადოქტორო სწავლების ინსტიტუტში სტუდენტის მიერ თემის დაცვამდე.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

11.3. კვლევითი კომპონენტის დაწყების შემდგომ, ყოველი სემესტრის დასასრულს სტუდენტისა და ხელმძღვანელის მიერ ინსტიტუტის საბჭოს

უნდა წარედგინოს მათ მიერ განხორციელებული საქმიანობის ანგარიშის ფორმები.

- 11.4. თუკი დოქტორანტი დარგობრივ სადისერტაციო საბჭოს მიმართავს განცხადებით სადისერტაციო თემის სათაურის შეცვლის შესახებ ბოლო სემესტრში, დარგობრივი სადისერტაციო საბჭო გადაწყვეტს აღნიშნული წარმოადგენს ტექნიკურ თუ კონცეპტუალურ ცვლილებას. თუკი ცვლილებები კონცეპტუალური ხასიათისაა, დოქტორანტი უფლებამოსილია, წარადგინოს სადისერტაციო ნაშრომი წინარე დაცვაზე საბჭოს მიერ გადაწყვეტილების მიღებიდან არანაკლებ ორი სემესტრის შემდგომ. ტექნიკური ხასიათის ცვლილებების შემთხვევაში, დოქტორანტი უფლებამოსილია სადისერტაციო ნაშრომის წარადგინოს წინარე დაცვისათვის ერთი თვის შემდეგ. ამ პუნქტში აღნიშნულ საკითხებზე გადაწყვეტილება მიიღება დარგობრივი სადისერტაციო საბჭოს წევრთა 3/4-ის მიერ.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

- 11.5. თუ დოქტორანტს სტუდენტის სტატუსი შეჩერებული აქვს ორზე მეტი სემესტრის განმავლობაში, სტუდენტის მიერ სტატუსის აღდგენის შემდგომ, დარგობრივი სადისერტაციო საბჭო იმსჯელებს თემის სათაურისა და კვლევის გეგმის შესახებ და უფლებამოსილია, მიიღოს გადაწყვეტილება მათი უცვლელად დატოვების ან ხელახლა დამტკიცების შესახებ.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

მუხლი 12. დოქტორანტის ხელმძღვანელი/თანახელმძღვანელი

- 12.1. თემის ხელმძღვანელი უნდა იყოს შხსუ-ს ან სხვა უსდ-ის ასოცირებული პროფესორი ან პროფესორი. ხელმძღვანელის მიერ შხსუ-ში აკადემიური თანამდებობის დატოვებისა და სხვა უსდ-ში აკადემიური პოზიციის დაკავების შემთხვევაში, იგი შესაძლებელია დარჩეს თემის ხელმძღვანელად და მოწვეულ იქნეს დარგობრივი სადისერტაციო საბჭოს წევრად. აღნიშნულის თაობაზე გადაწყვეტილებას იღებს დარგობრივი სადისერტაციო საბჭო.

- 12.2. სტუდენტის ან დარგობრივი სადისერტაციო საბჭოს მოთხოვნით, შესაძლებელია დისერტაციის თანახელმძღვანელად დაინიშნოს პირი, რომელსაც შესაბამის დარგში მინიჭებული აქვს დოქტორის აკადემიური ხარისხი. თანახელმძღვანელი უნდა იყოს საერთაშორისო გამოცდილების

მქონე სპეციალისტი, რომელიც ასევე ჩართულია დარგობრივ სამეცნიერო საქმიანობაში. თანახელმძღვანელი, საჭიროების შემთხვევაში, შესაძლოა დაინიშნოს არაუგვიანეს კვლევითი კომპონენტის ბოლო სემესტრის დასაწყისისა.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

- 12.3. სასწავლო კომპონენტის დასრულების შემდეგ, დარგობრივი სადისერტაციო საბჭოს მიერ, სავარაუდო ხელმძღვანელი მტკიცდება ხელმძღვანელად, თუ მას „აკადემიური დატვირთვისა და შრომის ანაზღაურების გაანგარიშების წესის“ მიხედვით დადგენილი ლიმიტების გათვალისწინებით აქვს შესაბამისი დატვირთვის აღების შესაძლებლობა. წინააღმდეგ შემთხვევაში, პროგრამის ხელმძღვანელის წარდგინებისა და სტუდენტის თანხმობის საფუძველზე დარგობრივი სადისერტაციო საბჭო ხელმძღვანელად ამტკიცებს სხვა პირს, რომელიც აკმაყოფილებს 12.1 პუნქტით დადგენილ მოთხოვნებს.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

- 12.4. თუკი დოქტორანტი მიმართავს ინსტიტუტს ხელმძღვანელის შეცვლის მოთხოვნით ან ხელმძღვანელი აცხადებს უარს საკუთარ პოზიციაზე, აღნიშნული საკითხი განსახილველად წარედგინება დარგობრივ სადისერტაციო საბჭოს. ხელმძღვანელის შეცვლის შემთხვევაში, სტუდენტი უფლებამოსილია, დისერტაცია დასაცავად წარადგინოს ხელმძღვანელის შეცვლიდან არანაკლებ ერთი სემესტრის შედგომ. ამასთან, თუ ხელმძღვანელის შეცვლამ განაპირობა სტუდენტის მიერ თემის შეცვლა, დისერტაციის დაცვა განხორციელდება წინამდებარე დებულების მე-11 მუხლით განსაზღვრულ ვადებში.

- 12.5. დოქტორანტის მიერ ხელმძღვანელისათვის თემისა და ავტორეფერატის საბოლოო ვარიანტის ჩაბარების შემდეგ, ხელმძღვანელი წერს დასკვნას არაუგვიანეს ერთი თვის ვადაში, რომლითაც, დარგობრივ სადისერტაციო საბჭოს წინაშე თემის წარდგენის მიზნით, ადასტურებს:

ა) პუბლიკაციების შესაბამისობას დისერტაციასთან;

ბ) ავტორეფერატის შესაბამისობას დისერტაციასთან;

გ) სტუდენტის მიერ დისერტაციაზე მუშაობის დასრულების ფაქტს (რაც გულისხმობს, რომ ნამუშევარს ახასიათებს სიახლე, სამეცნიერო/თეორიული და პრაქტიკული ღირებულება, მოიცავს ლიტერატურის მიმოხილვასა და კვლევით ნაწილს, შეესაბამება შხსუ-ს დისერტაციის ფორმატს და შესრულებულია სტილისტურად გამართული ენით).

მუხლი 13. პროგრამის ხელმძღვანელი

- 13.1. პროგრამის ხელმძღვანელი არის დარგობრივი სადისერტაციო საბჭოს წევრი.
- 13.2. პროგრამის ხელმძღვანელი პასუხისმგებელია პროგრამის განხორციელებაზე. იგი ვალდებულია ითანამშრომლოს ინსტიტუტთან საგანმანათლებლო პროცესის განხორციელებასა და ამ პროცესში წინამდებარე და შხსუ-ს სხვა დებულებებით განსაზღვრული, შესაბამისი დოკუმენტების წარმოებასთან დაკავშირებით.

მუხლი 14. სადისერტაციო საბჭო და დარგობრივი სადისერტაციო საბჭო

- 14.1. სადისერტაციო საბჭო შედგება ფაკულტეტის ყველა პროფესორისა და ასოცირებული პროფესორისაგან, რომელიც მტკიცდება აკადემიური საბჭოს მიერ. სადისერტაციო საბჭოს წევრები შეიძლება იყვნენ სხვა უსდ-ს ასოცირებული პროფესორები და/ან პროფესორები. ასეთ შემთხვევაში, აღნიშნულმა პირებმა უნდა წარმოადგინონ სხვა უსდ-ში მათი აკადემიური პოზიციის დამადასტურებელი დოკუმენტის ასლი და პუბლიკაციების სია.
- 14.2. სადისერტაციო საბჭო საკუთარი შემადგენლობიდან ამტკიცებს შესაბამის დარგობრივ სადისერტაციო საბჭოს, ამ დარგობრივი სადისერტაციო საბჭოს თავმჯდომარესა და მოადგილეს თითოეული სადოქტორო პროგრამისათვის ცალ-ცალკე. სადისერტაციო საბჭო უფლებამოსილია დარგობრივ სადისერტაციო საბჭოში წევრის სტატუსით მოიწვიოს შესაბამის დარგის სპეციალიტი, სხვა უსდ-ს აკადემიური პერსონალი.
- 14.3. დარგობრივ სადისერტაციო საბჭოში უნდა იყოს შესაბამისი პროგრამის არანაკლებ 5 (ხუთი) წარმომადგენელი. შხსუ-ს აკადემიური პერსონალი უნდა შეადგენდეს წევრთა ნახევარზე მეტს. პროფესორი/ასოცირებული

პროფესორი შესაძლებელია ერთდროულად იყოს ორი დარგობრივი სადისერტაციო საბჭოს წევრი (მიუხედავად იმისა, ისინი ერთ ფაკულტეტის სადისერტაციო საბჭოს შემადგენლობაში შედიან თუ არა).

- 14.4. ფაკულტეტის სადისერტაციო/დარგობრივი სადისერტაციო საბჭოს მდივნები ინიშნებიან აკადემიური საბჭოს მიერ. ფაკულტეტის სადისერტაციო საბჭოს მდივანი შესაძლებელია იყოს იმავედროულად იყოს დარგობრივი სადისერტაციო საბჭოს მდივანი.
- 14.5. ფაკულტეტის სადისერტაციო საბჭო/დარგობრივი სადისერტაციო საბჭო გადაწყვეტილებაუნარიანია, თუ მას ესწრება წევრთა უბრალო უმრავლესობა. გადაწყვეტილების მისაღებად, საჭიროა დამსწრე წევრთა უბრალო უმრავლესობის ხმა, გარდა წინამდებარე დებულის მე-11 მუხლის 11.5 პუნქტით გათვალისწინებული შემთხვევისა.
- 14.6. საბჭოს გადაწყვეტილებები ფორმდება ოქმის სახით, რომელსაც ხელს აწერს სადისერტაციო საბჭოს თავმჯდომარე, მდივანი და ყველა დამსწრე წევრი.
- 14.7. საბჭოს თავმჯდომარე უფლებამოსილია მოიწვიოს სხდომა. საბჭოს სხდომა შესაძლებელია ასევე მოწვეულ იქნეს წევრთა უბრალო უმრავლესობის მოთხოვნის საფუძველზე. ამ შემთხვევაში თავმჯდომარემ უნდა დანიშნოს სხდომა.
- 14.8. თავმჯდომარის არყოფნის შემთხვევაში, სხდომას უძღვება თავმჯდომარის მოადგილე.

მუხლი 15. სადისერტაციო საბჭოს უფლებები და მოვალეობები

- 15.1. ფაკულტეტის სადისერტაციო საბჭო ანიჭებს დოქტორის აკადემიურ ხარისხს, დაცვის კომისიის გადაწყვეტილების საფუძველზე.
- 15.2. დარგობრივი სადისერტაციო საბჭო, ხოლო მის არარსებობის შემთხვევაში, სადისერტაციო საბჭო:
 - ა) დოქტორანტის პროგრამაზე ჩარიცხვის მიზნით, კმნის მიმღებ კომისიას, განიხილავს წარდგენილი სადისერტაციო თემის მნიშვნელობას, მონაწილეობს დისერტაციის სათაურის ჩამოყალიბებაში, ამტკიცებს დისერტაციის სათაურს;

ბ) სადოქტორო პროგრამის ხელმძღვანელის წარდგინებით განიხილავს ხელმძღვანელის კანდიდატურას, აგრეთვე წყვეტს ხელმძღვანელობის შეწყვეტის საკითხს;

გ) განიხილავს დოქტორანტის ინდივიდუალურ კვლევით გეგმას;

დ) ამტკიცებს ექსპერტებსა და ოპონენტებს;

ე) ამტკიცებს სადისერტაციო კომისიის წევრებს;

ვ) განსაზღვრავს თემის დაცვის თარიღს;

ზ) აკადემიური საბჭოს წინაშე აყენებს დისერტაციის შეფასების კრიტერიუმების გადახედვის საკითხს.

15.3. სადისერტაციო საბჭოს თავმჯდომარე, ხოლო მისი არყოფნის შემთხვევაში თავმჯდომარის მოადგილე:

ა) უზრუნველყოფს საბჭოს საქმიანობის წარმართვას წინამდებარე დებულების შესაბამისად;

ბ) იწვევს და თავმჯდომარეობს საბჭოს სხდომებს;

გ) უძღვება თემის დაცვის პროცედურას.

15.4. სადისერტაციო საბჭოს მდივანი:

ა) ინახავს სადისერტაციო საბჭოს ოქმებს;

ბ) იღებს და აარქივებს თემის დაცვისათვის საჭირო დოკუმენტებს წინამდებარე დებულების შესაბამისად. თუკი დოკუმენტები არასრულყოფილია, მდივანს უფლება აქვს უარი თქვას მათ მიღებაზე;

გ) უწევს კონსულტაციას დოქტორანტს წარსადგენ დოკუმენტაციასთან დაკავშირებით, როგორც დისერტაციის დაცვამდე, ისე დაცვის შემდეგ;

დ) გადასცემს დისერტაციის, ავტორეფერატისა და პუბლიკაციის ასლებს ექსპერტებსა და ოპონენტებს (ელექტრონული ან/და მატერიალური ფორმით, მათი მოთხოვნის საფუძველზე);

ე) წინასწარ აწვდის ინფორმაციას დოქტორანტებს შეფასების კრიტერიუმების შესახებ და უწევს რეკომენდაციებს კვლევის ტექნიკურ ფორმატთან დაკავშირებით.

მუხლი 16. დისერტაციის დაცვისათვის წარდგენა

16.1. დისერტაცია წარმოადგენს დოქტორის აკადემიური ხარისხის მოსაპოვებლად, დოქტორანტის მიერ დაცულ სამეცნიერო ნაშრომს. იგი არის დოქტორანტის დამოუკიდებელი სამეცნიერო კვლევის შედეგი, რომელიც ეფუძნება ახალ შეძენილ ცოდნას და ემსახურება შესაბამისი დარგის განვითარებას. თუკი დოქტორანტი კვლევითი ჯგუფის წევრია, მისი წვლილი კვლევაში გამოყოფილი უნდა იყოს დისერტაციაში.

16.2. დისერტაცია იწერება პროგრამის სწავლების ენაზე. დოქტორანტმა აგრეთვე უნდა წარადგინოს დისერტაციის შემოკლებული ვარიანტი - ავტორეფერატი (15-20 გვერდი) ქართულ და ინგლისურ ენებზე იმ პროგრამებისათვის, სადაც სწავლების ენაა ქართული ან ინგლისური და ქართულად, ინგლისურად და თურქულად იმ პროგრამებზე, სადაც სწავლების ენაა თურქული.

16.3. დისერტაციის მოცულობა, ფორმატი და სტილი უნდა აკმაყოფილებდეს შემდეგ მოთხოვნებს:

- 110-150 დაბეჭდილი გვერდი (+/- 10%);
- ფონტის ზომა - 12, სათაურების ზომა - 14;
- ფონტი ინგლისური და თურქული ტექსტებისათვის - Times New Roman, ქართული ტექსტისათვის - Sylfaen;
- ხაზებს შორის ინტერვალი - 1,5 სმ.;
- მარცხენა მინდორი - 3 სმ.;
- მარჯვენა მინდორი - 1,5 სმ.;
- ზედა და ქვედა მინდვრები - 2,5 სმ..

დისერტაციის მოცულობა შესაძლოა განსხვავდებოდეს ამ მუხლით დადგენილი მოცულობისგან სპეციალობების მიხედვით. ავტორეფერატის პარამეტრები დისერტაციის პარამეტრების მსგავსია. დისერტაცია შესრულებული უნდა იყოს APA სტილში. დისერტაციის შესრულების მოთხოვნები განსაზღვრულია „სამაგისტრო ნაშრომისა და დისერტაციის მომზადების გზამკვლევაში“.

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

- 16.4. პლაგიატის შემოწმების მიზნით, დარგობრივი სადისერტაციო საბჭო ქმნის ჯგუფს, რომელშიც შედის პროგრამის ხელმძღვანელი, ერთ-ერთი ექსპერტი და ინსტიტუტის წარმომადგენელი, რომელიც შესაბამისი პროგრამის დახმარებით, ამოწმებს დოქტორანტის აკადემიურ კეთილსინდისიერებას.
- 16.5. წინარე დაცვაზე დაშვების მიზნით, დოქტორანტი დარგობრივი სადისერტაციო საბჭოს მდივანს წარუდგენს შემდეგ დოკუმენტაციას:

ა) განცხადება დისერტაციის დასრულების შესახებ;

ბ) სადოქტორო პროგრამის შესაბამისი სასწავლო კომპონენტების დასრულებისა და შესაბამისი კრედიტის მინიჭების დამადასტურებელი ნიშნების ფურცელი;

გ) სადისერტაციო თემასთან დაკავშირებული სულ მცირე სამი პუბლიკაცია, საიდანაც ერთი უნდა გამოქვეყნდეს საერთაშორისო რეფერირებად ინდექსირებად ჟურნალში, რომლის ინდექსების მაჩვენებელი განისაზღვრება სადოქტორო საგანმანათლებლო პროგრამებით ინდივიდუალურად, ერთი სტატია - საერთაშორისო რეცენზირებად ჟურნალში ან საერთაშორისო კონფერენციის მასალებში, ხოლო ერთი - საერთაშორისო რეცენზირებად ჟურნალში;

ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9

დ) სამეცნიერო ხელმძღვანელის დასტური დისერტაციასთან პუბლიკაციებისა და ავტორეფერატთან შესაბამისობის შესახებ, აგრეთვე დოქტორანტის მიერ სამუშაოს დასრულების შესახებ;

ე) დისერტაციისა და ავტორეფერატის აკინძული, შხსუ-ს სტანდარტებით დაბეჭდილი ოთხი ასლი და ელექტრონული ვერსია დისკით;

ვ) დოქტორანტის აქტიური სტატუსის დამადასტურებელი ცნობა სტუდენტურ საქმეთა განყოფილებიდან.

- 16.6. წინამდებარე მუხლის 16.5 პუნქტით განსაზღვრული პუბლიკაციები წარმოდგენილ უნდა იქნეს ასლის სახით (ჟურნალის სატიტულო ფურცელი, სარჩევი და სტატია). ამასთან, დასაბეჭდად მიღებული პუბლიკაციები მხედველობაში მიიღება მხოლოდ წინარე დაცვის დროს (პუბლიკაციის ტექსტი და დასაბეჭდად მიღების შესახებ დასტურის წერილი წარმოდგენილ უნდა იქნეს წინარე დაცვისათვის). ნაშრომების გამოქვეყნებამდე გადაწყვეტილება დაცვის დღის დანიშვნის შესახებ არ მიიღება.
- 16.7. დისერტაციის, ავტორეფერატისა და სხვა დოკუმენტაციის წარდგენის შემდეგ, არაუმეტეს ხუთი სამუშაო დღის ვადაში, დარგობრივი სადისერტაციო საბჭო ნიშნავს სულ მცირე ორ ექსპერტს.
- 16.8. თუკი დისერტაციის წინარე დაცვაზე სტუდენტი მიიღებს დადებით რეკომენდაციებს ყველა ექსპერტისაგან, მას უფლება აქვს იმავე ან მომდევნო სემესტრში დაიცვას სადისერტაციო ნაშრომი. თუკი დაცვის პერიოდად განისაზღვრება მომდევნო სემესტრი, სტუდენტი თავისუფლდება დამატებითი სწავლის საფასურის გადახდისაგან.

მუხლი 17. დისერტაციის ექსპერტები

- 17.1. დოქტორანტის მიერ დისერტაციის ჩაბარების შემდეგ, დისერტაციას აფასებს დარგობრივი სადისერტაციო საბჭოს მიერ, წინამდებარე დებულების მე-16 მუხლით განსაზღვრული წესით, დანიშნული არანაკლებ ორი ექსპერტი.
- 17.2. ექსპერტები უნდა იყვნენ შესაბამისი/მონათესავე დარგობრივი სადისერტაციო საბჭოს წევრი. დოქტორანტის პუბლიკაციის თანაავტორი არ შეიძლება იყოს მისი ექსპერტი.
- 17.3. თუკი დისერტაციის თემა დარგთაშორისია, ერთ-ერთი ექსპერტი შეიძლება დაინიშნოს უნივერსიტეტის სხვა დარგობრივი სადისერტაციო საბჭოდან.

- 17.4. დოქტორანტი დისერტაციის ასლს, ავტორეფერატსა და პუბლიკაციებს (ელექტრონული ან/და მატერიალური ფორმით, ექსპერტის მოთხოვნით) წარუდგენს ექსპერტს.
- 17.5. ექსპერტებმა, სადისერტაციო საბჭოს სამდივნოში, უნდა წარადგინონ დასკვნა მათი ექსპერტად დანიშნვიდან ერთი თვის განმავლობაში. დასკვნაში ყურადღება უნდა მიექცეს დისერტაციის ფორმატსა და სტილს, მათ შესაბამისობას ამ დებულებასთან; თუკი ექსპერტები მოითხოვენ დისერტაციის შესწორებას, დოქტორანტი ვალდებულია გაითვალისწინოს შენიშვნები წინამდებარე მუხლის 17.7 და 17.8 პუნქტებით განსაზღვრული ვადების გათვალისწინებით. აღნიშნული შესწორებების განხორციელების შემდეგ, ექსპერტი ვალდებულია დაწეროს საბოლოო დასკვნა 5 (ხუთი) სამუშაო დღის ვადაში. ამ დასკვნების ასლები ეგზავნება სტუდენტს სადისერტაციო საბჭოს მდივნის მიერ.
- 17.6. ექსპერტის დასკვნა უნდა მოიცავდეს შეფასებას შემდეგ საკითხებზე:
- ა) სადისერტაციო თემის საჭიროებაზე, სიახლეზე, მის სამეცნიერო და პრაქტიკულ მნიშვნელობაზე;
 - ბ) სტრუქტურის თაობაზე (მოიცავს შესავალს, ლიტერატურის მიმოხილვას, მსჯელობისა და კვლევით ნაწილებს, მონაცემების სტატისტიკურ დამუშავებასა და დასკვნას);
 - გ) ექსპერტის რეკომენდაციას (ტექნიკური გაუმჯობესების, მცირე შინაარსობრივი გაუმჯობესების, არსებითი გაუმჯობესების ან მოწონების/უარყოფის შესახებ);
 - დ) შეფასებაში გათვალისწინებული უნდა იყოს წინამდებარე დებულების 20-ე მუხლით დადგენილი მოთხოვნები.

- 17.7. თუ ერთ-ერთი ექსპერტის შეფასება არის დადებითი (ტექნიკური გაუმჯობესების შესახებ რეკომენდაციით) დოქტორანტს მიეცემა ვადა აღნიშნული რეკომენდაციის გასათვალისწინებლად. თუ ექსპერტის შეფასება არის უარყოფითი (მცირე შინაარსობრივი გაუმჯობესების, არსებითი გაუმჯობესების ან უარყოფის მითითებით) და დოქტორანტი ეთანხმება შეფასებას, მას მიეცემა დამატებითი ერთი სემესტრი დასკვნაში მითითებული შენიშვნების სადისერტაციო ნაშრომში ასახვისათვის. წინააღდეგ შემთხვევაში, ინიშნება დამატებითი ექსპერტი დარგობრივი სადისერტაციო საბჭოს მიერ. საბოლოოდ, თუკი სამი ექსპერტის დასკვნიდან ორი დადებითია და ერთი უარყოფითი, დოქტორანტი დაიშვება თემის წინარე დაცვაზე.
- 17.8. თუ ორი ექსპერტის შეფასება არის უარყოფითი, დისერტაცია უბრუნდება სტუდენტს გასაუმჯობესებლად სულ მცირე ერთი სემესტრის ვადით. ამ პერიოდში სტუდენტი იხდის სწავლის საფასურს და ხელმძღვანელს აუნაზღაურდება მის მიერ გაწეული დამატებითი სამუშაო.

მუხლი 18. დისერტაციის წინარე დაცვა

- 18.1. დისერტაციის წინარე დაცვა ინიშნება დარგობრივი სადისერტაციო საბჭოს მიერ ექსპერტების მიერ შეფასების მიღების შემდეგ წინამდებარე დებულების მე-17 მუხლით დადგენილი წესით.
- 18.2. წინარე დაცვას ესწრება დოქტორანტი, მისი ხელმძღვანელი, დარგობრივი სადისერტაციო საბჭოს თავმჯდომარე, ექსპერტები და სადოქტორო პროგრამის ხელმძღვანელი.
- 18.3. თუ წინარე დაცვის დროს გადაწყდება, რომ დისერტაცია საჭიროებს გაუმჯობესებას, აღნიშნული გაუმჯობესების შემდგომ დაინიშნება განმეორებითი შეხვედრა. არ შეიძლება ერთი და იმავე დისერტაციისათვის დაინიშნოს ორზე მეტი წინარე დაცვა. ასეთ შემთხვევაში დამტკიცებულ უნდა იქნეს ახალი კვლევის გეგმა წინამდებარე დებულებით დადგენილი წესით და სტუდენტს არ აქვს უფლება სადისერტაციო ნაშრომი წარადგინოს ერთ სემესტრზე ადრე.

მუხლი 19. დისერტაციის ოპონენტები

- 19.1. წინარე დაცვის წარმატებით დასრულების შემდგომ, დისერტაციის დაცვის მომდევნო ეტაპზე გადასვლის თაობაზე დარგობრივი სადისერტაციო საბჭოს გადაწყვეტილების საფუძველზე, დისერტაცია ფასდება სულ მცირე ორი ოპონენტის მიერ. ოპონენტებს უნდა ჰქონდეთ დოქტორის აკადემიური ხარისხი და მათი სამეცნიერო მოღვაწეობა და პუბლიკაციები უნდა შეესაბამებოდეს დისერტაციის თემას. ოპონენტად შესაძლოა მოწვეულ იქნეს სხვა უმაღლესი საგანმანათლებლო დაწესებულების (მათ შორის, უცხო ქვეყნის უსდ) ასოცირებული პროფესორი ან პროფესორი ან/და სამეცნიერო-კვლევითი ცენტრის მკვლევარი. ოპონენტები ინიშნებიან ექსპერტთა მიერ დისერტაციის დამტკიცებისთანავე.
- 19.2. ოპონენტებმა დასკვნა უნდა წარადგინონ დანიშნიდან ერთი თვის ვადაში. დასკვნაში ასახული უნდა იყოს შეფასება თემის საჭიროების, სიახლის, სამეცნიერო და პრაქტიკული მნიშვნელობის თაობაზე. ოპონენტმა უნდა გამოხატოს მოსაზრება დოქტორანტისათვის აკადემიური ხარისხის მინიჭების თაობაზე. შეფასებაში გათვალისწინებული უნდა იყოს წინამდებარე დებულების 20-ე მუხლით დადგენილი მოთხოვნები.
- 19.3. დოქტორანტის პუბლიკაციების თანაავტორი ან იმ სამეცნიერო ჯგუფის წევრი, სადაც შესრულდა კვლევა, არ შეიძლება იყოს მისი ოპონენტი.
- 19.4. პირი, რომელიც თანამდებობრივად დამოკიდებულია დოქტორანტზე, ვერ იქნება მისი ოპონენტი.
- 19.5. ოპონენტები არ შეიძლება მუშაობდნენ ერთსა და იმავე ორგანიზაციაში.
- 19.6. სადისერტაციო საბჭოს მდივანი უზრუნველყოფს სადისერტაციო ნაშრომის, რეზიუმესა და პუბლიკაციების ასლების (ელექტრონული ან/და მატერიალური ფორმით, ოპონენტის მოთხოვნის შესაბამისად) გადაეცემას ოპონენტებისათვის.
- 19.7. სადისერტაციო საბჭოს მდივანი ოპონენტების დასკვნის ასლებს აწვდის დოქტორანტს.

- 19.8. ოპონენტი, რომელმაც გააკეთა უარყოფითი შეფასება უნდა დაესწროს დაცვას. საერთაშორისო ოპონენტის შემთხვევაში, იგი უნდა დაესწროს ონლაინ რეჟიმში.
- 19.9. თუკი ოპონენტი, რომლის შეფასება უარყოფითია, უარს აცხადებს გამოცხადდეს თემის დაცვაზე, მას აუნაზღაურდება 30% და დაინიშნება ახალი ოპონენტი, წინამდებარე დებულებით განსაზღვრული პროცედურების თანახმად.
- 19.10. თუ ყველა შეფასება დადებითია, სულ მცირე ერთი ოპონენტი მაინც უნდა ესწრებოდეს დაცვას.

მუხლი 20. დისერტაციის შეფასება ექსპერტებისა და ოპონენტების მიერ

- 20.1. დადებითი შეფასების მიღებისათვის, სადოქტორო დისერტაცია უნდა ხასიათდებოდეს ორიგინალობით და იყოს დამოუკიდებელი მუშაობის შედეგი. იგი უნდა მოიცავდეს ლიტერატურის მიმოხილვას, მიზანშეწონილია საკითხის როგორც ისტორიული, ისე თანამედროვე პერიოდში არსებული მდგომარეობის მიმოხილვა, მსჯელობის ნაწილსა და კვლევას (გამოკითხვა, შემთხვევის ანალიზი, ექსპერტიმენტი და ა.შ. განხორციელებული მკვლევარის ან დოქტორანტის მიერ ან დოქტორანტის მიერ შემუშავებული პროგრამული უზრუნველყოფა) შესაბამისი სტატისტიკური მონაცემებით. ყველა მნიშვნელოვანი ცნების (განსაკუთრებით ახლის) განმარტება უნდა იყოს წარმოდგენილი. დისერტაცია უნდა აკმაყოფილებდეს შემდეგ მახასიათებლებს: სიახლე, აქტუალობა, სამეცნიერო/თეორიული და პრაქტიკული ღირებულება და ა.შ. ჰიპოთეზები, კითხვები და კვლევის დროს წამოჭრილი პრობლემები უნდა იყოს სათანადოდ დასაბუთებული. რეკომენდაციები და შეთავაზებული დასკვნები უნდა გამომდინარეობდეს დისერტაციაში არსებული ანალიზიდან.
- 20.2. დისერტაცია შესრულებული უნდა იყოს ლოგიკურად, გამართული ენით, პროფესიული ეთიკის ნორმების დაცვით. ციტირების, დამოწმების ტექნიკა და ბეჭდვის ფორმატი დაცული უნდა იყოს.
- 20.3. პუბლიკაციები უნდა ასახავდეს დისერტაციის ძირითად მასალას.

მუხლი 21. დაცვის კომისია

- 21.1. დაცვის კომისიის წევრების კანდიდატებს დარგობრივ სადისერტაციო საბჭოს დასამტკიცებლად წარუდგენს პროგრამის ხელმძღვანელი.
- 21.2. დარგობრივი სადისერტაციო საბჭო ამტკიცებს დაცვის კომისიის წევრებსა და ოპონენტებს ერთად.
- 21.3. დაცვის კომისია შედგება სულ მცირე 7 (შვიდი) წევრისაგან. ყველა ექსპერტი და ოპონენტი არის სადისერტაციო კომისიის წევრი. შპს-ს აკადემიურმა პერსონალმა უნდა შეადგინოს წევრთა ნახევარზე მეტი.
- 21.4. დაცვის კომისია მისი შემადგენლობიდან ირჩევს თავმჯდომარეს უბრალოდ უმრავლესობით, დაცვის პროცესის დაწყებამდე.
- 21.5. სადისერტაციო საბჭოს მდივანი იმავდროულად არის დაცვის კომისიის მდივანი, ხმის უფლების გარეშე, გარდა იმ შემთხვევისა, თუ მისი კვალიფიკაცია შეესაბამება დაცვის კომისიას.
- 21.6. დარგობრივი სადისერტაციო საბჭო წყვეტს დაცვის თარიღს და ატყობინებს სტუდენტს აღნიშნულის შესახებ. ინფორმაცია დაცვის შესახებ განთავსებულ უნდა იქნეს უნივერსიტეტის ვებ-გვერდზე მას შემდეგ, რაც ოპონენტები წარადგენენ თავიანთ დასკვნას დისერტაციის თაობაზე, მაგრამ არაუგვიანეს 10 (ათი) სამუშაო დღისა დაცვამდე.
- 21.7. დოქტორანტის თემის ხელმძღვანელი არ არის დაცვის კომისიის წევრი, მაგრამ იგი ესწრება დაცვას.
- 21.8. თემის დაცვამდე ათი სამუშაო დღით ადრე დაცვის კომისიის წევრებს მიეწოდებათ ავტორეფერატის ელექტრონული ვერსია. დაცვამდე დაცვის კომისიის ყველა წევრი უნდა გაეცნოს ოპონენტების დასკვნას და ნებისმიერ სხვა წერილობით შეფასებას, რაც ეგზავნება დაცვის კომისიას.
- 21.9. დაცვის კომისია გადაწყვეტილებაუნარიანია, თუ მას ესწრება წევრთა 2/3, მაგრამ არანაკლებ 5 (ხუთი) წევრისა.

- 21.10. დოქტორის აკადემიური ხარისხის მინიჭების წინაპირობას წარმოადგენს დაცვის კომისიის მიერ მინიჭებული ქულების საშუალო, არანაკლებ 51 ქულისა. სტუდენტის 41-50 ქულით შეფასების შემთხვევაში, სტუდენტს ეძლევა საშუალება გააუმჯობესოს სადისერტაციო ნაშრომი და წარადგინოს დასაცავად ერთი წლის განმავლობაში (არანაკლებ ერთი სემესტრის შემდეგ), ხოლო კომისიის მიერ სტუდენტის 41-ზე ნაკლები ქულით შეფასების შემთხვევაში, სტუდენტი კარგავს იმავე სადისერტაციო ნაშრომის წარდგენის უფლებას. ამასთან, კომისიის მიერ ნაშრომის შეფასების მიზნებისათვის, ფრიადი ნიშნავს შეფასების 91-100 ქულას, ძალიან კარგი - შეფასების 81-90 ქულას, კარგი - შეფასების 71-80 ქულას, საშუალო - შეფასების 61-70 ქულას, დამაკმაყოფილებელი - 51-60 ქულას, არადამაკმაყოფილებელი - შეფასების 41-50 ქულა, სრულიად არადამაკმაყოფილებელი - შეფასების 40 ქულა და ნაკლები.

მუხლი 22. დაცვისთვის მომზადება და დისერტაციის დაცვა

- 22.1. დაცვის თარიღი ინიშნება დარგობრივი სადისერტაციო საბჭოს მიერ წინამდებარე დებულების 21-ე მუხლის 21.6 პუნქტით განსაზღვრული წესით.
- 22.2. საბჭოს მდივანი ვალდებულია დოქტორანტს წერილობით შეატყობინოს სადისერტაციო საბჭოს გადაწყვეტილება დაცვაზე მისი დაშვების ან არდაშვების შესახებ და გადასცეს მას ოპონენტების დასკვნა დაცვამდე სულ მცირე ათი სამუშაო დღით ადრე. ინფორმაცია ასევე უნდა მოიცავდეს დაცვის თარიღს.
- 22.3. დოქტორანტთან დაკავშირებული დოკუმენტაცია ინახება სადისერტაციო საბჭოს არქივში. დოქტორანტს აქვს უფლება გაეცნოს მასთან დაკავშირებულ ნებისმიერ დოკუმენტაციას.
- 22.4. თემის დაცვა საჯაროა და იმართება პროგრამის სწავლების ენაზე. დაცვის შესახებ ინფორმაცია ქვეყნდება უნივერსიტეტის ვებ-გვერდზე დაცვამდე სულ მცირე 10 (ათი) სამუშაო დღით ადრე.
- 22.5. დაცვის პროცედურა მოიცავს:
- ა) დოქტორანტის პრეზენტაციას (არაუმეტეს 30 წუთი);

- ბ) ოპონენტების დასკვნის საჯარო გაცნობას;
- გ) დოქტორანტის პასუხებს დასკვნაში მითითებულ კითხვებზე;
- დ) სამეცნიერო დისკუსიას;
- ე) ხელმძღვანელის სიტყვას;
- ვ) დამსწრეთა მოსაზრებებს;
- ზ) დისერტაციის შეფასების დახურულ სესიას;
- თ) დისერტაციის შეფასებორმბის შედეგების საჯარო გამოცხადებას;
- ი) დოქტორანტის შემაჯამებელ სიტყვას.

22.6. თითო სესია მოიცავს მხოლოდ ერთი დისერტაციის დაცვას.

22.7. თუკი დაცვა ვერ ჩატარდება დაგეგმილ დროს საპატიო მიზეზის გამო, სტუდენტის და/ან დაცვის კომისიის წევრების მოთხოვნით, სადისერტაციო საბჭოს გადაწყვეტილების საფუძველზე, შეიძლება გადაიდოს არანაკლებ ორი კვირით, მაგრამ არაუმეტეს ერთი თვის ვადით. აღნიშნულის შესახებ შესაბამისი განცხადება გამოქვეყნდება უნივერსიტეტის ვებ-გვერდზე.

მუხლი 23. დისერტაციის შეფასება

23.1. დისერტაციის შეფასება ხდება წინამდებარე დებულებით განსაზღვრული კრიტერიუმების საფუძველზე.

23.2. დაცვა ფასდება კომისიის მიერ დახურულ სხდომაზე. დისერტაციისა და მისი შეფასებების საფუძველზე კომისია გადაწყვეტს საბოლოო შეფასებას.

23.3. შეფასება ორი სახისაა: დაიცვა ან ვერ დაიცვა.

23.4. სადისერტაციო ნაშრომის შეფასებისათვის გამოიყენება შემდეგი სისტემა:

ა) თუკი სტუდენტი მიიღებს შეფასებას:

ფრიადი (summa cum laude) - შესანიშნავი ნაშრომი;

ძალიან კარგი (magna cum laude) - შედეგი, რომელიც წაყენებულ მოთხოვნებს ყოველმხრივ აღემატება;

კარგი (cum laude) - შედეგი, რომელიც წაყენებულ მოთხოვნებს აღემატება;

საშუალო (bene) - საშუალო დონის ნაშრომი, რომელიც წაყენებულ ძირითად მოთხოვნებს აკმაყოფილებს;

დამაკმაყოფილებელი (rite) - შედეგი, რომელიც ხარვეზების მიუხედავად, წაყენებულ მოთხოვნებს მაინც აკმაყოფილებს -

მას მიენიჭება დოქტორის აკადემიური ხარისხი;

ბ) თუკი სტუდენტი მიიღებს შეფასებას - **არადამაკმაყოფილებელი (insufficient)** - არადამაკმაყოფილებელი დონის ნაშრომი, რომელიც ვერ აკმაყოფილებს მასში წაყენებულ მოთხოვნებს მასში არსებული მნიშვნელოვანი ხარვეზების გამო - მას აქვს უფლება გააუმჯობესოს და წარადგინოს ნაშრომი ხელახალ დაცვაზე ერთ წლის განმავლობაში.

გ) თუკი სტუდენტი მიიღებს შეფასებას - **სრულიად არადამაკმაყოფილებელი (sub omni canone)**, შედეგი, რომელიც წაყენებულ მოთხოვნებს სრულიად ვერ აკმაყოფილებს - მას არ აქვს ამავე დისერტაციის ხელახალი დაცვის უფლება.

23.5. შედეგებს აცხადებს კომისიის თავმჯდომარე.

მუხლი 24. აკადემიური ხარისხის მინიჭება

24.1. დოქტორის აკადემიური ხარისხის მინიჭებას ახორციელებს ფაკულტეტის სადისერტაციო საბჭო დაცვის კომისიის გადაწყვეტილების საფუძველზე.

24.2. დაცვის შემდეგ დისერტაციის ავტორეფერატი და შესაბამისი ოქმი იტვირთება უნივერსიტეტის ვებ-გვერდზე. ხოლო დისერტაციის ნაბეჭდი და ელექტრონული ვერსიები ხელმისაწვდომი უნდა იყოს უნივერსიტეტის ბიბლიოთეკაში. დისერტაციის მთლიანი ტექსტის ელექტრონული ვერსია შეიძლება გაიცეს ხელმისაწვდომი დაინტერესებული პირისათვის მისი მოთხოვნის საფუძველზე. ფაკულტეტის სადისერტაციო საბჭოს მდივანი

პასუხისმგებელია ოქმისა და ავტორეფერატის დროულად გამოქვეყნებაზე, დაცვიდან არაუგვიანეს ორი კვირის ვადაში.

- 24.3. დისერტაციის ორი ასლი და ავტორეფერატი უბრუნდება სტუდენტს, ორი ასლი რჩება უნივერსიტეტის ბიბლიოთეკაში, ხოლო ელექტრონული ვერსია ინახება უნივერსიტეტის არქივში.

მუხლი 25. დოქტორის აკადემიური ხარისხის დამადასტურებელი დოკუმენტი

- 25.1. რექტორის მიერ დოქტორანტის კურსდამთავრებულად ცნობის შესახებ ბრძანების გამოცემის შემდეგ, დიპლომის დაბეჭდვამდე, დოქტორანტის მოთხოვნის შემთხვევაში, სტუდენტურ საქმეთა სამსახურის მიერ გაიცემა ცნობა დოქტორის აკადემიური ხარისხის მინიჭების შესახებ.

მუხლი 26. ნაშრომის გაუქმება

- 26.1. დოქტორის აკადემიური ხარისხის დამადასტურებელი დიპლომი შეიძლება არ გაიცეს ან გაუქმდეს უკვე გაცემული დიპლომი, თუკი დადგინდება გაყალბებული კვლევის მონაცემების წარდგენის ან აკადემიური არაკეთილსინდისიერების ფაქტი (პლაგიატი). აღნიშნულის თაობაზე გადაწყვეტილება მიიღება ფაკულტეტის სადისერტაციო საბჭოს მიერ.

მუხლი 27. გარდამავალი და დასკვნითი დებულებები

- 27.1. სადოქტორო საგანმანათლებლო პროგრამასთან დაკავშირებული ფინანსური ვალდებულებები განსაზღვრულია „სწავლის საფასურის გადახდის წესით“.
- 27.2. საკითხები, რომლებიც არ არის აღნიშნული წინამდებარე დებულებაში, წესრიგდება „უმაღლესი განათლების შესახებ“ საქართველოს კანონით, „სასწავლო პროცესის მარეგულირებელი წესითა“ და უნივერსიტეტის სხვა დებულებებით.
- 27.3. წინამდებარე დებულებაში ცვლილებების შეტანა შესაძლებელია მისი მიღებისათვის დადგენილი გზით.
- 27.4. წინამდებარე დებულება ძალაში შედის აკადემიური საბჭოს მიერ დამტკიცების შემდგომ და მოქმედებს 2016 - 2017 აკადემიური წლიდან.
- 27.4.¹ დებულების მე-16 მუხლის მე-5 პუნქტის „გ“ ქვეპუნქტში შესული ცვლილება გავრცელდეს იმ სტუდენტებზე, რომლებსაც ცვლილების ამოქმედების თარიღისათვის, ვალდებულები არიან წარადგინონ დისერტაცია დარგობრივი სადისერტაციო საბჭოს წინაშე წინარე დაცვისათვის.
ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9
- 27.4.² წინამდებარე დებულების მე-16 მუხლის მე-5 პუნქტის „გ“ ქვეპუნქტისა და 27-ე მუხლის 27.2 პუნქტის გათვალისწინებით, უნივერსიტეტის სამაგისტრო და სადოქტორო სწავლების ინსტიტუტმა უზრუნველყოს 2017-2018 სასწავლო წლის გაზაფხულის სემესტრის დაწყებამდე სადოქტორო საგანმანათლებლო პროგრამებში ასახვის მიზნით შესაბამისი ღონისძიებების გატარება უნივერსიტეტის უფლებამოსილ სტრუქტურულ ერთეულებთან შეთანხმებით.
ცვლილებები შეტანილია აკადემიური საბჭოს 2017 წლის 22 აგვისტოს გადაწყვეტილებით - ოქმი №9
- 27.5. წინამდებარე დებულების შესრულებაზე კონტროლს ახორციელებს უნივერსიტეტის სამაგისტრო და სადოქტორო სწავლების ინსტიტუტი.

უნივერსიტეტის წესების შეუსრულებლობა დაუშვებელია. ყველა ვალდებულია იცნობდეს შხსუ-ს მიერ შემუშავებულ წესებსა და რეგულაციებს.

შხსუ ყველას თანაბარ შესაძლებლობებს სთავაზობს, განურჩევლად სქესის, რასის, ეროვნების, წარმომავლობის, რწმენის, საზოგადოებრივი სტატუსის, ფიზიკური, გონებრივი, ემოციური სხვაობისა და სწავლის განსხვავებული უნარისა.

გამოსცა:

შპს - შავი ზღვის საერთაშორისო უნივერსიტეტი
დავით აღმაშენებლის ხეივანი, 13 კმ., 2, 0131
თბილისი, საქართველო
www.ibsu.edu.ge
contact@ibsu.edu.ge

